



Cyfarfod Blynyddol 2024

Adroddiad y Trysorydd

(elusen rhif 1190243)

Cyflwynir yr adroddiad hwn ar y cyd â Datganiad o'r Cyfrifon am 2023/24 sy'n crynhoi holl incwm a gwariant y Clwb ac yn dangos faint o arian sydd mewn llaw ar ddiwedd y flwyddyn.

Aelodaeth

'Roedd gan y Clwb 262 o aelodau yn talu £25 y pen o dâl aelodaeth yn ystod y flwyddyn. Daeth hyn ag incwm o £6,550. Yn ogystal 'roedd yna nifer o "garedigion". Unigolion ydi'r rhain sydd wedi bod yn aelodau yn y gorffennol ond heb gynyddu (na dileu) eu harchebion banc ac o'r herwydd sydd ddim mwyach yn gymwys i'w hystyried yn aelodau o'r Clwb. O'r rhain 'roedd 27 yn talu £20, 25 yn talu £15 a 7 yn talu symiau llai gan roi cyfanswm incwm o £980.

Mae'r Clwb yn perthyn i'r Cyngor Mynydda Prydeinig (CMP), sy'n darparu yswiriant ar gyfer y gweithgareddau. 'Roedd cost ymaelodi â'r CMP yn £23.90 y pen (gyda rhywfaint o ostyngiad yn ystod ail hanner y flwyddyn). Cyfanswm y taliad i'r CMP oedd £6,225.95.

Cinio blynyddol

Mae'r derbyniadau a thaliadau ar gyfer y cinio blynyddol yn cwmpasu dwy flwyddyn ariannol fel rheol. Yn y flwyddyn dan sylw derbyniwyd £620 at ginio blynyddol 2023 yn y Royal Oak, Betws y Coed a thalwyd £1,165. Er bod hyn yn edrych fel colled sylweddol nid dyna'r gwir sefyllfa gan fod nifer o ragdaliadau wedi eu derbyn yn y flwyddyn ariannol flaenorol. (Rhyw £50 oedd y gwahaniaeth terfynol rhwng yr incwm a'r gwariant, sy'n gyson â blynyddoedd eraill). Bydd yr un sefyllfa yn codi yng nghyfrifon 2024/25 gan fod rhai taliadau wedi eu derbyn a'u gwneud mewn perthynas â chinio 2024 cyn i'r llyfrau gau.

Teithiau

Trefnwyd tair taith breswyl yn ystod y flwyddyn - i Grianlarich mis Chwefror, ac i Hawes ac i Inchree mis Mai. 'Roedd cyfanswm y derbyniadau ar gyfer y dair taith yn £18,723 a'r gwariant yn £20,657. Ond fel gyda'r cinio blynyddol mae hyn cuddio'r ffaith fod nifer wedi talu blaendal ar gyfer taith Crianlarich cyn i'r llyfrau gau ar gyfrifon y flwyddyn gynt, fel y gwelir o golofn 2022/3. Diolch i drefnwyr y teithiau am

eu hymdrechion di-flino i sicrhau nad yw'r teithiau yn gwneud colled a'u bod yn talu amdanynt eu hunain neu'n dangos rhywfaint o warged.

Incwm arall

Yr unig incwm arall oedd llog banc (noder fod y gyfradd llog wedi cynyddu gryn dipyn yn y flwyddyn dan sylw) a rhoddion gan aelodau (sef gordaliadau heb eu hawlio'n ôl).

Gwariant arall

'Roedd y gwariant yn cynnwys y costau rhedeg arferol yn ymwneud â bancio, gweinyddiaeth, y wefan, y ddarlith yn yr Eisteddfod Genedlaethol ac aelodaeth o'r Bartneriaeth Awyr Agored (sy'n cynnig hyfforddiant i'r aelodau). Yn ogystal gwnaed taliad o £528 i Urdd Gobaith Cymru am redeg penwythnos fynydda ar y cyd â'r Clwb er cof am y diweddar Gareth Pierce. Daeth yr arian hwn o Gronfa Coffa Gareth Pierce; mae £360 ar ôl yn y gronfa a bydd hwn yn cael ei wario ar benwythnos arall gyffelyb yn ystod blwyddyn ariannol 2024/25.

Arian wrth gefn

Ar ddiwedd y flwyddyn 'roedd gan y Clwb £7,176.99 yn y coffrau. (Mae hyn yn cynnwys £360 yng Nghronfa Goffa Gareth Pierce, £52.50 o ragdaliadau ar gyfer cinio blynyddol 2024 a £6,764.49 yn y gronfa gyffredinol). Mae'r sefyllfa yn parhau'n iach ac yn dangos cynnydd unwaith eto ar y flwyddyn gynt, yn bennaf oherwydd yr incwm gan y caredigion a'r gwarged ar y teithiau. Gorffennwyd y flwyddyn gydag oddeutu £1,700 yn fwy o arian yn y gronfa gyffredinol nag oedd yno ar ddechrau'r flwyddyn.

Mae'r Clwb angen cadw arian wrth gefn yn y gronfa gyffredinol er mwyn sicrhau llif arian digonol (gan fod rhaid weithiau talu ymlaen llaw am lety ar deithiau preswyl cyn casglu arian gan y rhai sy'n mynychu) ac hefyd er mwyn gwarchod yn erbyn gwariant annisgwyl. Credir fod swm o £5000 yn ddigonol ar gyfer hynny ar hyn o bryd. Gan bod angen i'r arian for ar gael ar fyr rybudd mae'n cael ei gadw mewn cyfrif cadw yn y banc yn hytrach na'i fuddsoddi am dymor hirach.

Rhagwelir y bydd y gronfa gyffredinol yn gostwng yn sylweddol yn ystod blwyddyn ariannol 2024/25 o ganlyniad i benderfyniad y CMP i gynyddu eu ffi i £29.33 y pen o 1 Ionawr 2025. Mae modd i'r Clwb ymdopi gyda hyn yn 2025 oherwydd cryfder y gronfa gyffredinol ond yn amlwg fydd hynny ddim yn gynaliadwy am gyfnod hir a bydd raid dod i benderfyniad yng nghyfarfod blynyddol 2025 ar sut i ymateb i'r codiad annisgwyl hwn.

Dilys Phillips
24 Hydref 2024